

Date – 14/01/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Armed forces veteran day vawi 10-na, Ex- servicemen Reunion ni bawk chu vawiin khan Assam Rifles chhuahsan tak Gajraj Hall ah neih a ni a, Chief Minister Pu Lalduhawman a hmanpui.
2. Naktuk khian Mizoram pumah lirngching thlen thulha chet lak dan tur enchhinna State Level Mock Exercise on Earthquake Disaster neih a ni dawn.
3. Prime Minister Narendra Modia chuan loneitute chu ram indin chhohna kawngah sawrkar thawhpui chak tak an nih thu a sawi.
4. China chuan Iran ramchhung buaina a reh a, muann a awm theih nan a thlawp zel dawn a ti.

<><><>

ARMED FORCES VETERAN DAY

Armed forces veteran day vawi 10-na, Ex- servicemen Reunion ni bawk chu vawiin khan Assam Rifles chhuahsan tak Gajraj Hall ah neih a ni a, Chief Minister Pu Lalduhawman a hmanpui.

Chief Minister hian Veer Naris & Gallantry awardees lawmman chi hrang hrang a sem a. A dawngtu zingah India ram sipai huaisen chawimawina sang ber pahnihna Kirti Chakra nikuma dawngtu Captain Lalrinawma Sailo a tel a. Ani hi Mizo zinga Kirti Chakra dawng thei pahnihna niin Mizoram sorkar chuan lawmpuina cheng nuai sawm a pe a ni. Tin he lawmman semnaah hian ex-seviceman zinga upa ber Sepoy Selkhum-a kum 91 pawh a tel ani.

Chief Minister chuan thusawiin, India ram zalenna sualnaah te, Indopui pahnihnaa India ram venhimnaah te, ram zalen hnua indona hrang hrangah te Mizoten kan thawhhlawk ve hle a ti a. Mizo thalai India sipaia tangte chu an awmna hmun apiangah fak an hlawh thin a ti.

Armed forces veteran day pual hun hmannaah hian Home Minister Pu K. Sapdanga, MLA Pu TBC Lalvenchunga leh Lt. Col. Clement Lalhmingthanga ten Chief Minister hi an tawiawm.

<><><>

SUPPLY MINISTER

Food Civil Supply & Consumers Affairs Minister Pu B. Lalchhanzova chuan, Gas Pipe hmanga Tripura atanga Mizorama Natural gas thlunzawm hna thawh mekte endikin Agartala a tlawh a; Tripura Natural Gas Corporation Limited hotute nen vawiin khan inkawmin Tripura-a Natural gas hmangtu Industry lian PRAN Beverages (India) Pvt. Ltd., Tripura Industrial Growth Centre, CNG Station leh ONGC hmunpuite a tlawh kual a; eirawngbawl nana natural gas hmangtu pipeline connection 330 awmna Subham Solitaire a tlawh bawk.

Minister chuan Project a hlawhtlin ngei theih nan leh a hun taka thawh zawh a nih theih nan hnathawktute chu uluk leh thahnemngai taka thawk tura chahin duhsakna a hlan a; IGCL leh TNGCL hotute pawhin Mizoram sawrkarin an phurpuinaah lawmthu an sawi ve bawk a ni.

Natural Gas Pipeline hi Panisagar Terminal, Tripura atanga intan niin Sihhmui, Mizoram-ah Receiving Terminal bun a ni dawn a. Panisagar leh Sihhmui inkar pipe thui zawng hi Km 119.5 niin Pipe diameter hi feet 1 a ni a, leimin leh shock laka him tur pipe hman niin pipeline hian Kanhmun, Zawlnuam, Kawrthah, Tuidam, Darlak, Mamit, Lengte te a paltlang dawn a; Panisagar - Sihhmui inkara Pipe phum hna hi Indradhanush Gas Grid Limited (IGCL) ten thawkin, Sihhmui Terminal atanga Aizawl khawpui chhunga gas sem darh leh enkawlzui hna chu Tripura Natural Gas Corporation Limited (TNGCL) ten an chang ve thung dawn a ni. Aizawl khawpui bakah hian Mizoram hmun hrang hrangah a tahtawla la semdarh zel tura ruahman a ni bawk.

He Tripura - Mizoram Gas Pipeline Project hi North East Natural Gas Pipeline Grid hnuai mi niin, kum 2027 December thla velah thawh zawh hman beisei a ni a, tun dinhmunah zaa 45 vel thawh zawh tawh a nih thu IGCL hotute chuan an sawi a ni.



STATE LEVEL MOCK EXERCISE

Naktuk khian Mizoram pumah lirnghing thlen thulha chet lak dan tur enchhinna State Level Mock Exercise on Earthquake Disaster neih a ni dawn a, hemi chungchang hi vawiin khan Disaster Management & Rehabilitation Commissioner & Secretary Pu Udit Prakash Rai chuan sawifiahin mock exercise a nih angin a tak taka thil thleng thei entirna tur a ni naa, mipui te chiaina lo turin a chah.

Pu Udit Prakash Rai chuan, Mizoram chu lirnghing nasa tak thlen theihna Seismic Zone 5 atangin lirnghing rapthlak tak thlen theihna, fimkhur leh inpuahchah ngai Seismic Zone 6 ah dah thar a ni a ti a, sorkar mai ni lo mimal, chhungkua leh khawtlang pawh lirnghing na tak mai lo thleng palh thei laka inpuahchah a ngaih thu a sawi.

Sorkar laipua National Disaster Management Authority leh Mizoram a State Disaster Management Authority leh District tina District Disaster Management Authority te chuan State Level Mock Exercise on Earthquake Disaster hi naktukah District tin khawpuia hmun thlan bikah te neih a nih dawn thu DMR hotute chuan an sawi a; hei hi nasa taka Mizoram rawn sawi nghing a, chhiatna rawn thlen thei chungchanga fimkhur tulzia leh inpuahchah dan tur mipui inzirtir na tur leh, chhiatna thleng thei hmachhawn tura inpuahchahna tuaihriam nan leh, chhiatna lo thlen palha hmachhawn dan thiam na tur bakah chhiatna kaihhnawh department hrang hrang ten an hmanrua theuh an hman thiam leh thiam loh en nan leh an tih tur theulte an chian leh zual nan te, midangte nen a thawhho that leh zual nan leh hmasawn an ngaihna laite hriat chhuah a nih theih na atana tih a ni, an ti bawk.

Byte : Udit Prakash Rai

DMR hotute chuan mock drill-ah chuan chawhma dar 10-ah DC ten siren an ti ri dawn a, chawhma lama drill chu chhun dar 12 vel thleng a nih dawn thu leh tlai lamah district tina hmun thlan bikah dar 4-6 thleng neih leh a ni dawn an ti a. Lirngching palh thei hre chung a chet lak dan enchhinna a ni tih hriaa chia lo turin mipui an ngen a, thudik lo vawrh darh lo tur leh Mizo mipui zawng zawng tana tangkai leh tha tur a nih avangin mipui hriathiamna, tawiawmna leh thawhpaina an ngen nghal baw a ni.

<><><>

ADCC

Aizawl District Congress Committee (ADCC) hruaitute chuan vawiin khan Aizawl Press Club-ah thuthar thehdarhtute kawmin, BJP sorkarin MGNREGA thlak nana G-RAM-G a kalpui chu tha lo an tih thu leh angai anga kalpui leh an duh thu an sawi.

ADCC President Pu Lalhmingthanga Pachuau chuan MGNREGA hi kum 2006 a hman tan anih atangin ni vbc 180 chuang inhlawhna siam a ni tawh a, chhungkaw vbc 4 point 6 in an chhawr tawh a, kawng leh tuizem vbc 10 chuang siam a ni tawh an ti a, kum 20 chhung India rama thingtlang mite inngahna MGNREGA tihtawp a nita chu paw an tih thu a sawi.

MGNREGA chu CAG Audit telin zirchianna vawi 200 chuang paltlang tawh a nih thu leh project hlawhtling leh nghawng nei tha ber zinga mi a ni tih hmuhchhuah a nih thu Pu Lalhmingthanga chuan a sawi a, heivang hian Modi-a sorkar hian tihtawp an duh hle a ni tih an thiltih hian a ti lang a ni, a ti baw.

(Byte - Pu Lalhmingthanga, ADCC President)

Pu Lalhmingthanga chuan Modi sorkar chuan dan anga inhlawhna Central sorkarin a pek chu an ti tawpin kuthnathawktute tana inngahna tha tak chu a tihtawp sak ta tih sawiin, MGNREGA a tawp chuan hnathawh tur nei lo an pung dawn an ti a, mipuite chu minimum wages hlawh pha loa chhawr an ni dawn tih sawiin khawsak harsat avanga khawpuia pmlut a titam hle dawn tih sawiin Panchayat leh VC ten thuneihna an hloh dawn niin a sawi.

Congress hian MGNREGA Bachao Sangram tia vuahin thil phut pali an nei a, heng zingah hian Langtlang taka kalpui leh

MGNREGA thlak lova a ngai anga kalpui leh Constitution in a pek anga inhlawh theihna chanvo peklet bakah Ram pumah minimum wages atan Rs 400 hman te a ni.

<><><>

FOREST MINISTER

Forest Minister Pu Lalthansangan National Plan for Conservation of Aquatic Ecosystems (NCPA) hnuai tanpuina chu Tamdil humhalh leh tihhmasawn nana thawktu chhungkaw 106 hnenah vawiin khan a sem chhuak.

Minister chuan Tamdil chu humhalh a ngai hle tih a sawi a, Tamdil leh a chhehvel khuaa chengte chu an thlai chinte enkawl nan chemical tel lei tih thatna leh rannung tihremna (insecticides) te hmang lo hram turin a ngen a, hei hian lei hriselna a tichhia a ni, a ti. Forest Minister chuan ram leilung hausakna te chu hmang thiam turin kalkhawmte a fuih a, chutih rualin mamawh bak hmang lo tur leh nungchate

tichereu zawnga khawsa lo turin a chah bawk. Tamdil chu khualzin hiptu pawimawh tak a ni chho mek tih sawiin nikum lamah pawh Sangha Kutpui hlawhtling taka hman a lo ni tawh a ni, a ti a, Tamdilin hma a sawn zel theih nan leh a chhehvela thing leh nungchate humhalh a nih theih nan kalkhawmte chu theih tawp chhuah a, Forest department te thlawp zel turin a chah nghal a ni.

Tamdil enkawlina tur riruung Tamdil Wetland Conservation Plan hi kum 5 danah siam thin a ni a, he plan zulzui hian hmasawna hna thawh thin a ni bawk. Hetiang hnathawhna atana mamawh te chu National Plan for Conservation of Aquatic Eco-System (NPCA) atanga dawn thin a ni. Tamdil tihhmasawna tur atan leh a tuihna te a lo chak lehzual theihna tur atan a chhehvel khaw mipuite zinga thawktu chhungkaw 574 hnenah tun 2022-2026 plan chhung hian tanpuina sumfai sem chhuah a ni a. Vawiin hian Tualbung atangin chhungkaw 31, Sihfa atangin chhungkaw 30, Saitual Chawnpui atangin chhungkaw 45, a vaiin chhungkaw 106 hnenah tanpuina sumfai hi sem chhuah a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM VISHWAKARMA SCHEME AWARENESS PROGRAMME

Vawiin khan DC Pisapui Hall-ah PM Vishwakarma Scheme Awareness Programme huaihawt niin scheme kaltlanga hamthatna awm thei hrang hrang sawi a ni.

He hun hmanpuitu Aizawl DC Pu Lalhriatpuia chuan tualchhung kut themthiamte tan PM Vishwakarma Scheme hnuaiyah hian kawng hrang hranga hmasawna a awm tih sawiin scheme kaltlanga eizawna nghet, mahni mai nilo chhungkua leh tu chhuan thlenga intundin nan an hman theihna tur a nih avangin tualchhung kut themthiam te chu Scheme hmang tangkai turin a sawm a ni.

Vawiin hun hmanah hian artisans thahnem tak telin, PM Vishwakarma Scheme chungchang, Digital Marketing, financial/digital literacy, Financial Literacy, Advertising and Packaging Promotion, QR Code generation leh topic dang hrang hrang te zirho a ni.



PM ON FARMERS

Prime Minister Narendra Modia chuan loneitute chu ram indin chhohna kawngah sawrkar thawhpui chak tak an nih thu leh ram intodelh tura beihpui thlaknaah an thawhhlawk hle a ti. Vawiina New Delhi-a Union Minister of State for I&B Dr.L.Murugana chenna ina Pongal lawmnaah telin Prime Minister Modia chuan sawrkar laipuiin loneitute dawmkang turin theithawp a chhuah a ti a. An dinhmun siamthatna turin chhum lo chat loin a thawk reng a ni a ti bawk.

Pongal chungchang sawiin PM Modia chuan khuanu thilsiamte nena inrem taka chhungkua leh khawtlang an khawsak hona kawng a ni a ti a. Tamil hnamte nunphung leh nungchate chu inhne hnai tak an ni a ti a. Tun hunah hian ramchung hmun dangah pawh Pongal ang tho hian Lohri, Makar Sankranti, Magh Bihu leh kut dangte hman ve anih thu sawiin heng Kut te hian hnam inpumkhatna leh inunauna a ti nghet a ni a ti bawk.



CHINA ON IRAN

China chuan Iran ramchung buaina a reh a, muann a awm theih nan a thlawp zel dawn a ti. Chines Foreign Ministry thupuangtu Lin Jian chuan he thu hi sawiin Iran ramchung buainaah ramdang an inrawlh leh tharum hmanga vau chu a dodal tlat a ti a. Tunhnaia US President Donald Trump-an Iran nena sumdawna ti mek ramte lakah chhiah hmanga hrekna a lek tur a sawi chu chhangletin Pu Lin-a chuan China chuan insumdawntawnaa chhiah awm mek chu tihdanglam loh a duh a ti a. Tariff hmanga indona chu tuman an hlawkpui lo tih sawiin China chuan a tana tha leh dan hmanga a chanvo leh thuneihnate nghet takin a hum tlat dawn tih a sawi bawk a ni.

Hetihlai hian United Nations-a Iran Palai chaun UN Security Council leh UN Secretary-General te hnenah zualkoin US in tharum hmangin a vau niin a puh a. Iran tualchung buainaah US chu a inrawlh thu leh sipai tha chakna hmanga beiha a vau a ti a. US in a ngaihdan a sawi chhuah chu khawvel dan kalh anih thu leh UN Charter in khapna te bawhchhiatnaah Tehran chuan a ngai tih a sawi bawk a ni.

